

## **Compañero**

Patent Ochsner

Mir si i de Stossziit zäme durs Chrüzfüür,  
roubritterglicch  
diä gäge'n'üs u mir gäg aus  
hei Geisse'neier gsuecht  
toujours überlade uf huuchtünnem Ys  
mit Formel-1-Rennfahrergalgehonor

Mir hei ging e Schwelbrand umetreit  
u Bruchschtück vom Nüt  
vou Hohn u Schpott für au dä  
Haarschpauterdünnbrättbohrerchlychram  
vo chatzbugglige Chummerbuebe  
mit ihrne Hasehärz schtändig im Chräbsgang

**Hey, compañero sentimental**  
**i wär nid dä won i hüt bi**  
**we du denn nid drby wärsch gsi**  
**compañero sentimental!**  
**schad geit aus so schnäu verby - u geit**  
**wyter ohni di**

mir hei ygschteckt u mir hei usteilt  
prysboxerglych  
mit fasch aune Wasser gwäsche  
näb de schueh im Schilf  
si vo dr Mördermittagshitz  
fadegrad i die gmässigti Zone

**Hey, compañero sentimental**  
**i wär nid dä won i hüt bi**  
**we du denn nid drby wärsch gsi**  
**compañero sentimental!**  
**schad geit aus so schnäu verby - u geit**  
**wyter ohni di**